

40061

:2





宗鑑法林卷二

集雲堂編

釋迦文佛

世尊於靈山會上拈花示衆衆皆默然惟迦葉破  
顏微笑世尊曰吾有正法眼藏涅槃妙心實相無  
相微妙法門不立文字教外別傳付囑摩訶迦葉  
白雲端云迦葉善觀風雲別氣色雖然還覺頂門重  
麼黃龍心云直下穿過髑髏已是換却眼睛臨危  
不在悚人向甚處見釋迦老子僧問靈山拈花意





旨如何雲峰悅云一言既出駟馬難追迦葉微笑意  
旨如何云口是禍門 高峰妙云世尊扶頭迦葉扶  
尾直至如今擡舉不起莫有共著力者麼以兩手作  
扶勢云也祇兀底 獅林則云要問黃面老子者兩  
件物從甚處得來擬開口好與一喝 平陽恣云且  
道靈山有付囑無付囑喝一喝云千聖不知何處去  
倚天長劍逼人寒 雲菴悅云我若作飲光見伊恁  
麼道便好再發一笑看老漢又如何折合 崇化能  
云世尊拈花憐兒不覺醜迦葉微笑刺腦入膠盆  
霜風刮地掃枯芟誰覺東君令已回惟有嶺梅先漏

泄一枝獨向雪中開

佛慧泉

飲光誰謂悟拈花微笑依然隔海涯黃面祇圖傳大  
事赤睂終不打貧家

祖印明

古塚露枯骨窮源逢斷橋一番新雨過翠色滿林梢

白楊順

項上鐵枷三百斤分明有理不容伸默然鷄足峰前  
坐猶把金襴誑後人

尼無著持

末後無端重漏泄焦齒翁翁嚼生鐵玉鞭擊碎月明  
珠累及兒孫揚醜拙

湛堂深

八十婆婆未嫁人柔腸百結向誰伸而今趁得東君



力喜見眉閒一點春

香幢海

化母無私似掌平百花如錦正春深尋常繡出鴛鴦

看今日和鍼度與人

惟一潤

烽火一然萬國憂與君攜手上高樓名姬暗笑勤王

士不見夫人在上頭

南菴依

高髻雲鬟宮樣粧春風一曲杜韋娘司空見慣渾閒

事惱殺蘇州刺史腸

石公瓊

君起早臣起早彤庭月落天將曉金帶趨朝對越時

御爐縹緲宮闈窈午門人靜月初昇殿閣一聲鳴鳳

鳥騎聲獅

世尊因文殊至諸佛集處諸佛各還惟一女子入

於三昧殊曰云何此女子得近佛座而我不能世

尊曰汝但覺此女子而自問之文殊遶女子三匝

鳴指一下乃托至梵天盡其神力而不能出世尊

曰假使百千文殊亦出此女子定不得下方過四

十二恒河沙國土有罔明菩薩能出此女子定須

與罔明從地湧出世尊敕出罔明乃鳴指一下女

子於是從定而出

翠巖芝云僧投寺裏宿賊打不防家 五雲逢云不

惟文殊不能出此定祇恐如來也出此定不得 翠



巖真問僧文殊因甚出不得罔明因甚却出得英邵  
武方其問時以手捏其膝而去真笑云賣匙箸漢未  
在 天童覺云若定若動當人變弄鴻毛輕而不輕  
泰山重而不重還知老瞿曇鼻孔在我手裏麼 龍  
翔訢舉公案了拈拄杖云一串穿却南磬格云本來  
一串用穿作麼 理安問云古今盡道女子出定殊  
不知個個破家蕩產今日有三十棒要世尊喫何故  
不因漁父引怎得見波濤

拂拭瑤琴月下彈調高雪曲和應難五侯費盡平生  
志從此詩書嬾更看

寶峰照

坐擁羣峰覆白雲鶯啼深谷不知春巖前花雨紛紛  
落夢覺初回識故人

石門易

畫得天然別花閒試展開黃鶯偷眼覷不敢下枝來  
慈受深

徑山杲

出得出不得是定非正定罔明與文殊喪却窮性命  
一畝之地三蛇九鼠仔細看來是何面紫

佛照光

誰在畫樓西相逢笑語低到家春色晚花落鷓鴣啼  
雪菴瑾

花落銀牀春爛熳月沉金帳夜迢迢虛堂寂寞無人



共祗把檀香盡意燒

中峰本

玉苑梁園翫早春滿林香艷醉遊人不禁簾外啼鶯  
切空使落花狼藉深

理安問

玄石一醒醉三年妻兒抱首哭蒼天饒君題盡招魂

賦樂得安閒自在眠文殊智罔明賢出入如何得話

圓春光不改東風面惹得江南啼杜鵑

三宜孟

錦城絲管日紛紛半入江風半入雲此曲祗應天上

有人閒能得幾回聞

南菴依

君在湘江頭妾在湘江尾相思不相見共飲湘江水

撫松客

輪囷鐵幹漫梳風嶺外丹楓鬪彩紅亦有幽思寫不  
得和煙和雨在雲中

法林音

世尊示隨色摩尼珠問五方天王此珠作何色時

五方天王互說異色世尊藏珠復擡手曰此珠作

何色天王曰佛手無珠何處有色世尊曰汝何迷

倒之甚吾將世珠示之便強說有青黃赤白色吾

將真珠示之便總不知時五方天王悉皆契悟

綠雨蕉云大小世尊被五方天王換却眼睛也不知

世尊在尼拘律樹下坐次二商人問世尊還見車

過不曰不見還聞不曰不聞莫禪定不曰不禪定



莫睡臥不日不睡臥莫別去不日不別去商人乃  
歎曰善哉世尊覺而不見遂獻白氍毹兩段

天童悟云商人如是問世尊如是答甚處是商人見  
世尊覺而不見處 大愚鵬云三界大師被商人推  
在三百丈爛泥坑裏至今起不得

世尊昔至多子塔前命摩訶迦葉分座令坐以僧  
伽黎圍之遂告曰吾有正法眼藏密付於汝汝當  
護持傳授將來無令斷絕

僧問興化多子塔前共談何事化云一人傳實萬人  
傳虛

密傳分半座正好驀面唾不與麼且放過子孫未免

遭殃禍

海印信

於道無所證方通萬法路或明或暗行不慎亦不護  
月來松色寒雲去青山露今古天台橋幾人能得度  
投子青

世尊臨入涅槃文殊請再轉法輪世尊咄曰文殊  
吾四十九年未曾說一字請我再轉法輪是吾曾  
轉法輪耶

雪峰空云世尊從文殊請不從文殊請 友可玄云  
相逢盡道休官好林下何曾見一人



末上何曾轉法輪祇今再轉謾勞神路行人不知天  
曉猶把靈符執夜明

北磻簡

老漢生平太脫空將無作有誑盲聾臨期一語方真  
實也是闍黎飯後鐘

別山智

當陽據座已周遮何事迎風更撒沙囚口賊賊招盡  
了清廉猶自向人誇

法林音

世尊於涅槃會上以手摩胸曰汝等善觀吾紫磨  
金色之身瞻仰取足勿令後悔若謂我滅度非吾  
弟子若謂吾不滅度亦非吾弟子時百萬億眾悉  
皆契悟

雲峰悅云然則膏肓之病不足以發藥雲峰今日且  
作死馬醫汝等諸人皮下還有血麼 東禪觀云眾  
中若有個作者纔見伊以手摩胸便出約住云瞿曇  
你者醜舉止休拈出也他若知非決定緘口免見百  
萬億眾隨邪倒見 高峰妙云老漢四十九年顛之  
倒之橫說豎說貴圖末後殷勤殊不知賺他百萬億  
眾至今墮在鐵圍山下無由解脫 清化嶷云當時  
山僧若在但輕輕向世尊背上撫一下云老不休心  
非但令瞿曇滿面慚惶亦免百萬人天杓卜聽虛聲  
崇先奇云奈以堅自割膏以明自焚黃面瞿曇至



死不變強哉矯

摩胸告衆誑嬰兒怎奈身移步不移接響承虛三千

載春風依舊草萋萋

長靈卓

風搖柳綫波旬舞雨浥花腮慶喜悲黃面瞿曇何處

去令人到此祇攢眉

無準範

雙林樹下手摩胸說有談無恣脫空若謂瞿曇曾入

滅錯教啼鳥笑春風

虛舟度

老倒瞿曇不識羞臨行猶自逞風流摩胸示衆歸何

處啼鳥一聲山更幽

皖山凝

世尊涅槃日迦葉最後至世尊乃於棺中露雙趺

示之迦葉乃作禮請如來以三昧火而自闍維卽

時金棺從七寶牀陞舉繞俱尸羅城七匝却還本

處化火光三昧而自焚之

城山洽云黃面老子賣弄四十九年猶未足意臨末  
梢頭又做出許多伎倆真個不知死活雖然如是粉  
骨碎身未足醜

未出王宮已涅槃何須雙足露金棺致令迦葉雙眉

皺慶喜門前倒刹竿

佛鑑勲

臨行當休未肯休雙趺一出便難收至今骨節連毛

竅暴露春風百草頭

虛堂愚



周行七步猶成跡  
柳示雙趺豈易收  
微雨灑花千點  
淚淡烟籠竹一堆愁

高峰妙

開口已經遭打殺  
臨終又賣醜  
行藏生平浩氣難收  
拾死到棺材也發狂

靈機觀

世尊未離兜率已降王宮  
未出母胎度人已畢

天嶽晝云莫待是非來入耳  
從前知己反為讐  
不

退勇云新羅國裏火灼吳越石  
人燒腳誌公拋却杖

頭剪刀打倒天台國清寺裏豐干  
住底墻壁汾陽太

子院裏驀然聳出一隻匾柴  
高郵野鴨逢人便低頭

云師太師太乃左右顧視云  
玄沙去後無消息紅白

枝枝不著華

利刃有蜜不須舐  
蠱毒之家水莫嘗  
不舐不嘗俱不

犯端然衣錦自還鄉

大慧杲

未離兜率降王宮  
便就刀山入鑊湯  
等閒擒住白拈

賊滿眼俱為敗露賊

瞎堂遠

肌骨當初赫赤窮  
面皮今日厚千重  
撩頭搭尾應更

點羸賽閣黎齋後鐘

或菴體

日出天歡喜雲生地  
起愁如何人不老  
得似水長流

千巖長

朱絃彈夜月翠袖舞春風  
祇者逍遙處何人得與同



怨中慍

蜀魄千年尚怨誰  
聲聲啼血向花枝  
滿山明月東風

夜正是愁人不寐時  
天嶽畫

者貼老鼠藥  
佳人恨喫著喫著  
便成顛不攀頭定赤

腳漢關喻

諸經

經首八

僧問地藏琛以字不成八字不是未審是甚麼字藏

云看取下註腳古南門云卽火是注腳

以字不是八不成森羅萬象此中明直饒巧說千般

妙不是漚和不是經披雲寂

我佛金言義海深開遮惟要悟真心首標妙在當頭

劄密使泥牛曉夜吟雲居祐

以字不成八字非爍迦羅眼不能窺一毛頭上重拈

出忿怒那吒失却威徑山杲

鳥跡半露蒼苔蚪蚪并遊春水若不信受奉行未免

卽從座起石碧明

不向經題識本真紙堆討甚法王身未開梵篋承當

去免作循行數墨人絕岸湘

以字不成八不是春風拂檻花猶睡王孫何處未歸



來芳草萋萋愁滿地

覺浪盛

以字不成八字不就乍看是豈細讀如豆不若兩宜

剡衿續袖

从

三宜孟

由來種樹爲乘涼樹長猶嫌暗客牕盡力推開推不

去令人千古費商量

且拙訥

蒼頡難造羅什難譯牟尼拈出自先不識

僧穎實

楞嚴阿難自行乞食次

乞食原無一定方若爲非意問檀郎慈傷月面袈裟  
客情溺山肴窈窕娘嬌許鏡分花避笑豔畱釵比玉  
慙香若非鸚鵡將人喚肯信溫柔是夢鄉

自求磨

楞嚴佛告阿難吾不見時何不見吾不見之處若  
見不見自然非彼不見之相若不見吾不見之地  
自然非物云何非汝

博山來云盡大地是個釋迦阿難壑著釋迦鼻孔盡  
大地是個阿難釋迦裂破阿難胸襟且道向甚麼處  
見甚麼處不見者裏著得一隻眼黃面老子非但瞞  
人亦乃自瞞 妙偉俊云世尊此語有兩負門若檢  
點得出一對鴛鴦池邊獨立檢點不出一雙孤雁撲  
地高飛

全象全牛意不殊從來作者共名模如今要見瞿曇



老刹刹塵塵在半途

雪竇顯

堂前露柱久懷胎產下孩兒頗俊哉未解語言先作

賦一操直取狀元來

白雲端

說離百非存規則言無一法尚筌筍毘耶默默曾緘

口摩竭寥寥正掩扉

佛鑑勲

初學賣花日嬌羞掩齒牙及至容顏老脫然無可遮

却笑白雲空自散不知明月落誰家

崇覺空

滄海瀝乾太虛充滿衲僧鼻孔長古佛舌頭短珠絲  
度九曲玉璣纔一轉直下相逢不識渠始信斯人不

同伴

宏智覺

隔林彷彿聞機杼知有人家在翠微及至入門親見

了元來直是小兒嘻

簡堂機

石潤非玉水麗非金大禹決而西溯卞和泣而陸沉

美兮渺兮錯古礬今

虛堂愚

愁腸百結事難別啞子喫苦向誰說有語祇可訴東

風相如怎解中心結

湛然澄

甕牖繩樞毗隸家揭竿斬木枉喧譁要知紫蓋雲屯

者一劍能誅白帝蛇

靈潤機

楞嚴佛敕文殊將咒往護

休尋貝葉及樺皮文彩隨形卽污伊頂法豈常情測



度咒心須大智傳持紅爐那許畱春雪黑沼空悲染  
素絲會得它山皆故里縱橫有路自超岐

自求膺

楞嚴佛謂阿難若能轉物卽同如來

若能轉物卽如來春暖山花處處開自有一雙窮相

手不曾容易舞三台

白雲端

雨色和烟匝四維眼皮未綻若爲窺等閒覷破金剛

際坦蕩無因役路岐

或菴體

他人住處我不住他人行處我不行不是與人難共

住大都緇素要分明

此山應

堯之垂衣禹之行水輪扁斲而手美紀昌射而利矢

能其能所其所人兮物兮孰此孰彼

德微昱

田裏青螺皮作骨階前紅莧葉爲花蠨蛸身腹無非

蟹水母眼睛全是蝦

斷流渡

楞嚴見見之時見非是見見猶離見見不能及

能仁珪云落花有意隨流水流水無心戀落花

松操云世祖功臣三十六雲臺爭似釣臺高

妙偉

俊云世尊一似小兒喫李忙向赤邊齧忽然齧破指

頭直得血滅梵天

沒絃琴上無私曲一度彈來轉轆轤斷巖流水少知

音六六不成三十六

妙峰善



瘦藤拄到風烟上乞與遊人眼界寬不知眼界寬多  
少白鳥去盡青天還

樸翁銘

雨洗淡紅桃萼嫩風搖淺碧柳絲輕白雲影裏怪石  
露綠水光中古木清

潛菴光

海底波斯失却金雙盲婆子草中尋夜深摸得松毛  
刺走徧東村叫賣鍼

天如則

鰲山艷艷樂從遊儘夜風光映碧流月落更殘天際  
曉醉扶公子上高樓

印山先

一片潮聲下石頭江亭送別使人愁可憐垂柳絲千  
尺似為春江縮去舟

靈潤機

楞嚴七處徵心

七處徵心款便成推窮尋逐案分明都緣家賊難防  
避撥亂乾坤見太平

卍菴顏

吹糠著米翻成特地不因一事不長一智

北磻簡

七處徵他天外天毫光直射阿難肩瞿曇忒殺憐兒  
切逼得鮎魚上竹竿

絕岸湘

滄溟吸盡露珊瑚直取驪龍領下珠三十餘年尋海  
藏不知身在寶山居

玉笈乾

楞嚴八還辨見

明暗色空不可還不可還者絕躋攀夾截虛空成畔



岸一重水隔一重山 已菴顏

楞嚴阿難大眾獲本妙心

東西南北捉虛空海角天涯信不通力盡神疲無處

覓萬年松在祝融峰 已菴顏

適我昔所願今者已滿足是玉也大奇祇恐不是玉

北礪簡

楞嚴妙性圓明離諸名相

侶巖荷云妙性豈不是名圓明豈不是相作麼生說  
個離諸名相底道理

一錢為本萬錢利富而不足貧有餘換骨奪胎些子

藥輸他潘闥倒騎驢 已菴顏

金盤不可動輒轉難住停待良久閒圓明湛如露

北礪簡

子丑寅卯丙丁甲乙小盡廿九大盡三十海神知貴

不知價畱與人閒光照夜 牧雲門

楞嚴諸可還者自然非汝不汝還者非汝而誰

能仁珪云常恨春歸無覓處不知轉入此中來喝一

喝云三十年後莫道能仁教壞人家兒女 寒松操

云本欲逃名山裏住住山名反出人閒

還還還後更無還一個閒人天地閒昨夜大蟲遭虎



巖皮毛落盡體元斑

絕岸湘

日暖風和景更奇  
華華草草露全機  
茶藤一陣香風起  
引得遊蜂到處飛

心聞賁

不汝還者復是誰  
殘紅流在釣魚磯  
日斜風定無人掃  
燕子銜來水際飛

天目禮

梧桐葉落正三秋  
鴈羽翩翩去自由  
漠漠楚天飛不到  
且隨寒月宿汀洲

伊菴彥

日永烟消古殿涼  
太平無事酒旗香  
放牛歸馬知誰力  
恬憺風規有一腔

證心修

故國飄零事已非  
烟波江上月明歸  
酣歌驚起沙汀

鴈盡向蘆花深處飛

師瞿濟

孤舟閒繫汨羅灣  
終日沉沉烟雨攢  
天際曉風吹散後  
霜斜獨對水晶盤

越德祖

楞嚴六解一亡

根塵縛脫本同源  
一處休復六用捐  
手把一條紅斷貫  
孃生鼻孔一時穿

卮菴顏

六用無功信不通  
一時分付與春風  
篆烟一縷閒清晝  
百鳥不來花自紅

北礪簡

楞嚴阿難大衆復白佛言  
若此妙明真淨妙心本  
來徧圓如是乃至大地草木  
蠕動含靈本元真如



卽是如來成佛真體佛體真實云何復有地獄餓鬼畜生

雙劍峰前古寺基天尊元是一牟尼時難祇得同香火莫聽閒人說是非

卮菴顏

三蛇九鼠一畝之地竿木隨身逢場作戲

北礪簡

楞嚴汝但棄其生滅守於真常常光現前根塵識心自然銷落

靈巖儲喝一喝云黃面老子和麩糶麪二千年來罕人酬價天寧旣開者個行戶難教客貨久滯今朝一時攤向人前知時達變者便請滿載而去其或遲鈍

卓拄杖云早晚行情不定莫言不道

楞嚴若以能推底是汝心則是認賊爲子

脩山主別云若能推底不是汝心則是認子爲賊

天童覺云如今推也是子是賊買帽相頭食魚去骨

寶壽新云世尊祇知其一不知其二龍濟祇知其

二不知其一者裏則不然能推底是心也得不是心

也得何故朝朝正月半夜夜是元宵

楞嚴當知虛空生汝心內猶如片雲點太清裏况諸世界在虛空耶汝等一人發真歸元此十方空悉皆消殞



五祖演云一人發真歸元十方虛空觸著磕著 昭  
 覺勤云一人發真歸元十方虛空錦上添華 洞山  
 度云一人發真歸元十方虛空八字打開乃展兩手  
 一人發真歸元十方虛空消殞試問楊岐栗蓬何似  
 雲門胡餅 尼無著持

瞌睡茫茫困思來喫椀濃茶便眼開四海五湖皇化  
 裏更無一物是塵埃 朴翁銘

曾伴溪雲歸晚色猶陪落日泛秋聲世閒無限丹青  
 手一段傷心畫不成 覺浪盛

握卽成拳開卽成掌片雲太清不離舊樣開發羣蒙

俯提弱喪南海波斯入大唐眉毛祇在眼睛上 牧雲門

摩月干霄勢莫凌春來寫碧浴波心平田莊上憧憧

客推倒方知路不平 觀濤奇

楞嚴知見立知卽無明本知見無見斯卽涅槃無  
 漏真淨云何是中更容他物

道場如云釋迦老子和身放倒後代兒孫如何接續  
 要會麼通玄不是人閒世滿目青山何處尋

明眼人前三尺暗賓中無主主中賓夜叉拈起吉撩

棒打落松梢月一輪 天如則

楞嚴跋陀婆羅入浴忽悟水因



了事衲僧消一個長連床上展腳臥夢中曾說悟圓  
通香水洗來驀面唾

雪竇顯

洗塵觸體兩空寂妙證密圓超見思白璧無瑕空受  
玷圓通會裏受塗糊

塗毒策

楞嚴佛言富樓那如汝所言清淨本然云何忽生  
山河大地汝常不聞如來宣說性覺妙明本覺明  
妙

清淨本然徧法界山河大地卽皆現性覺妙明認影  
明眼耳便隨身色轉

卮菴顏

彌滿清淨中不容他山河大地萬象森羅

北磻簡

楞嚴觀世音菩薩成三十二應身獲十四無畏法  
良哉觀世音旋聞與聲脫犬吠驢鳴不休世出世

閒活鱖鱖

瞎堂遠

三十二應不思議十四無畏如流水男子身中入定  
時女子身中從定起

卮菴顏

趁隊選圓通無端立下風當時供死款錯說在聞中

北磻簡

楞嚴佛言阿難此等衆生不識本心受此輪迴經  
無量劫不得真淨皆由隨順殺盜淫故反此三種  
又則出生無殺盜淫有名鬼倫無名天趣有無相



傾起輪迴性

七處精研一妄心更隨三業殺盜淫身心不是閒家  
具前箭猶輕後箭深

已菴顏

客舍并州已十霜歸心日夜憶咸陽無端又渡桑乾

水却望并州是故鄉

北礪簡

楞嚴無令心魔自起深孽

瞿曇徹底老婆心見明色發理難任入鄉隨俗那伽

定佛魔到此盡平沉

已菴顏

挽弓須挽強用槍須用長射人須射馬擒賊先擒王

北礪簡

圓覺如是我聞一時婆伽婆入於神通大光明藏  
三昧正受一切如來光嚴住持是諸衆生清淨覺  
地身心寂滅平等本際圓滿十方不二隨順

東西南北水茫茫無角鐵牛入海藏千眼大悲尋不  
見倒騎佛殿入僧堂

治父川

圓覺於不二境現諸淨土與大菩薩摩訶薩十萬  
人俱

明鏡當臺照不差短長好醜盡歸家山河大地渾如  
故不妨隨處翫烟霞

治父川

圓覺非幻不滅



不屬內外與中間纔落思惟入魔境大丈夫兒不自  
欺翻身坐斷毘盧頂

月林觀

圓覺修多羅教如標月指

方便門指頭月誦譌因底多甄別冷光靄靄登清途  
匝地茫茫尋舊穴指看畫處眼中屑到此何須更饒  
舌

育王達

圓覺一切障礙卽究竟覺

枯樹雲充葉凋梅雪作花擊桐成木響蘸雪喫冬瓜  
長天秋水孤鶩落霞

雪堂行

早朝心悶三杯酒午後頭昏一碗茶入夜脫衣伸腳

睡五更走起眼眯磨

或菴體

愛惡胸頭蕩沒塵牛溲馬渤等皆珍黃金不必呼爲  
貴阿魏何妨世有真

介菴進

圓覺有我愛者亦愛涅槃伏我愛根爲涅槃相

黑山鬼窟至幽陰認得頑空盡力尋何似天窗饒一  
撥頓令大地作黃金

一錘打破精靈窟頓令虛空露出骨說甚騎牛李老  
君其中恍恍與惚惚

靈潤機

圓覺棄愛樂捨還滋愛本便現有爲增上善果皆  
輪迴故不成聖道



傀儡牽絲舞柘枝百般俊俏百般宜自從舞罷青絲  
斷堪笑渠儂撒手歸

圓覺居一切時不起妄念於諸妄心亦不息滅住  
妄想境不加了知於無了知不辨真實

天寧琦云若然者道有也得道無也得向上也得向  
下也得得也得不得也得數片白雲籠古寺一條綠  
水繞青山 報恩秀云居一切時不起妄念不於諸  
妄心亦不息滅不住妄想境不加了知不於無了知  
不辨真實不圭峰科此一段謂之忘心頓證又名忘  
心入覺萬松四個不字且道合屬那一科 博山來

云四個不字是殺人刀是活人劍點鐵成金旋天轉  
地萬松門下卓卓全該若是絕學沙門更須從頭刪  
過畔 萬仞壁云釋迦老子橫身躡倒直至上無沖  
天之志下無入地之謀若有人救得敢保腳下烟生  
若救不得但知隨例飡飽子也得三文買草屨 玉  
笈乾云生處好討錢熟處好過年

黃花爛爛翠竹珊珊江南地暖塞北天寒遊人去後  
無消息畱得雲山到老看

晦堂心

舉手攀南斗翻身倚北辰出頭天外看誰是我般人

鼓山珪



荷葉團團似鏡菱角尖尖似錐風吹柳絮毛毬  
走雨打梨花蛺蝶飛

徑山杲

和烟釣月是生涯古策風高未足誇款乃一聲天地  
闊祖師何處渡流沙

或菴體

猢猻喫毛蟲烏狗上佛殿大地雪漫漫澄江淨如練  
圓極峯

生鐵鑄牛頭牽犁還拽耙智者笑忻忻愚者驚怪差

古往今來幾百年更向鬼門重貼卦

密菴傑

庭前栽萵苣萵苣生火筋火筋開蓮花蓮花結木瓜  
木瓜纔劈破撒出白油蔴參

伽堂仁

身世悠悠不繫舟得隨流處且隨流今朝有酒今朝

醉明日無錢明日愁

石菴珞

春眠不覺曉處處聞啼鳥夜來風雨聲花落知多少

朴翁銘

春生夏長澹飯粗茶魚投濁水彩奔齷家

無準範

火不待日而熱風不待月而涼渴來飲水困來上牀

鳧足自短鶴脰自長誰在原西寺鐘聲送夕陽

古南門

草屨踏遍江南雪歸看廬山石上雲却笑閒身猶未

老尋梅幾度出松門

弘覺恣

伯勞西去鴈東來李白桃紅歲歲開萬事無過隨分



好人生何用苦安排

竺菴成

茅菴隱隱傍溪邊撥霧移芝種石田轉步看花花欲  
醉流鶯不覺落窗前

濟水洗

早識郎君本是儔燈前月下且風流好風流看取朱

衣暗點頭

玉笈乾

黃梅時節家家雨春草池塘處處蛙白鷺下田千點  
雪黃鸝上樹一枝花

撫松害

圓覺以大圓覺爲我伽藍

佛鎧堅云淨躡躡曲不藏直赤灑灑坐斷威音更有  
一句不可道破

毫髮不畱縱橫自由闡外乾坤廓落大方無外優游  
明明祖師意明明百草頭禪破狐疑網截斷愛河流  
縱有回天力爭如直下休四衢道中淨躡躡放出瀉

山水牯牛

圓悟勤

圓覺恒作是念我今此身四大和合髮毛爪齒等  
皆歸地涕唾膿血等皆歸水煖氣歸火動轉歸風  
四大各離今者妄身當在何處

今者妄身當在何不應飲水更尋波狂心誤認鑑中  
影豈異迷頭演若多

本覺一

茨菇葉爛別西灣蓮子華開尚未還妾夢不離江上



水人傳夫在鳳凰山

于集成

宗鑑法林卷二

終

宗鑑法林卷三

集雲堂編

諸經

法華佛放眷閒白毫相光照東方萬八千世界

蠻奴赤腳上皇州賣盡珍奇跨白牛貪看市朝人作  
市又隨歌舞上官樓多意氣好風流月冷珠簾挂玉  
鈎分明忘却來時路百尺竿頭鞦韆毬

圓極岑

法華止止不須說我法妙難思諸增上慢者聞必  
不敬信



天寧琦云說了也止得麼黃面老人分疎不下卓拄  
杖云有時拈在千峰頂劃斷天雲不放高 虎角喫  
畫○相舉起云世尊我以異方便助顯第一義免使  
者老子自生疑惑 妙偉俊云世尊五戒不持將常  
住物掩爲已有

春滿皇都月滿階婆心痛切爲誰哀兒孫自有兒孫  
福何必將金掘窮埋 默菴慧

法華假使滿世閒皆如舍利弗盡思共度量不能  
測佛智

五祖演云尋常衲僧家高揖釋迦不拜彌勒是會佛

智不會佛智衆中有則有祇是藏牙伏爪太平有個  
見處不惜着毛舉向諸人待有人問隨口便答 破  
菴先云畢竟如何是佛智乃頌

雪子落紛紛烏盆變白盆忽然日頭出依舊是烏盆  
東廊壁洞竟無遮百衲花鍼補綺紗掩在風前人不  
識細看還是破袈裟 樹南祚

法華譬如長者有一大宅於後宅舍忽然火起  
胡蜂休戀舊時窠五百郎君不奈何慾火逼來無走  
路癡心要上白牛車門前羊鹿權爲喻室內嗟喋總  
是譌燧焯臭烟相惱處出身不用動干戈 冶父川



法華此經開方便門示真實相深固幽遠無人能到

謾言幽遠涉途程到者方知不夜城鼓角聲寒蓮漏永佛燈猶作向來明

圓極岑

法華是法住法位世閒相常住

雲門云釋迦老子甚處去也 法林音云人說跛腳老單單祇一橛果然

犬子便吠賊牛子便牽犁衲僧若恁麼未曾摸著皮

楊岐會

世閒相常住黃鶯啼綠樹真個可憐生動著便飛去

朴翁銘

芙蓉葉爛別西灣蓮子花開尚未還妾夢不離江上水人傳郎在鳳凰山

祖翁銳

法華若人散亂心入於塔廟中一稱南無佛皆已成佛道

平陽恣舉偈畢云且道以何爲驗良久云片葉飄庭際西風萬里秋

一樣花蹊一樣紅千株桃李萬株穠何人識得春風面五色芳菲處處逢

遠菴儂

法華授記品



祖翁田地舊皇都且莫從人向外圖空劫國名何處  
起威音佛號是誰呼溪山在在雖云異雲月家家豈  
有殊寧可無鞵赤腳走丈夫豈肯受塗糊百愚斯

法華是法非思量分別之所能解

一朝起來七件事柴米油鹽醬酢茶有人識得其中

主不用天涯問作家

竺菴成

法華十方佛土中惟有一乘法無二亦無三除佛  
方便說

憨休乾云如何是方便說寒夜凝朝露晴天散夕霞  
法華大通智勝佛十劫坐道場佛法不現前不得

### 成佛道

三際斷時凡聖盡十身圓處刹塵周無私應物隨高  
下抹過僧祇大劫脩保寧勇

燕坐道場經十劫一一從頭俱漏泄世間多少守株  
人掉棒擬打天邊月徑山杲

太平時代不談兵路不齋糧戶不扃十劫坐來成底  
事平生肝膽一時傾道場融

劫初鑄就毘盧印古篆雕蟲尚宛然堪笑堪悲人不  
識却嫌字畫不完全環溪一

穴處巢居太古風魚潛水底鳥翔空一腔樸素渾無



象雲卷星攢文自工又安容乎竅鑿混沌脂粉鴻濛  
湛然澄

端妍嬌面露些些因甚還將衫袖遮疑殺古今人無  
數半思半恨滿天涯  
聖可玉

法華如來如實知見三界之相無有生死若退若  
出亦無在世及滅度者非實非虛非如非異不如  
三界見於三界如斯之事如來明見無有錯謬

岫巖峰頭神禹碑字青石赤形模奇無目仙人纔一  
見便應撫掌笑嘻嘻雲暗蒼龍化葛陂  
圓極岑

火虐風饕水漬根石邊尚有舊苔痕化工肯未隨寒

暑又捻清香爲返魂  
閒極雲

法華普門品咒詛諸毒藥所欲害身者念彼觀音  
力還著於本人

東坡別云念彼觀音力兩家都沒事法眼益因閱至  
此乃頌云咒詛毒藥形殺之逆眼耳若通本人何失  
法華若有衆生聞是觀世音菩薩品者當知是人  
功德不少

觀音門普普門收纔著襴衫便不羞昨夜猿啼新嶺  
上今朝鶴唳古溪頭惡風飄墮迴光息欲火焚燒當  
處休瓔珞受來都不用平生活計冷湫湫  
治父川



文殊般若清淨行者不入涅槃破戒比丘不入地獄

僧問洞山全意旨如何全云度盡無遺影還他越涅槃  
理安問拈拄杖云清淨行者不入涅槃破戒比丘不入地獄卓一下云曼殊大士來也靠杖云斷岍孤舟  
天嶽晝云我爲你作個方便譬如有人自不  
欲屙却要走出占人坑廁你道還好笑麼若向者裏  
辨得我也許你向衲僧門下識得些子臭氣  
養就家欄水牯牛自歸自去有來由而今穩臥深雲  
裏秦不管兮漢不收

祖印明

壁上安燈盞堂前置酒臺悶來打三盞何處得愁來

徑山杲

清淨行者不涅槃破戒比丘無地獄天台相接到西川  
總是自家親眷屬

照堂一

夜來村飲歸健到三四五摩挲青莓苔莫瞋驚著汝  
自得暉

陪錢弄傀儡拌命打鞦韆渾家無眼見掩面哭蒼天

或菴體

國有定亂劍家無白澤圖神仙張果老踏破藥葫蘆

朴翁銘



清淨行者清淨破戒比丘破戒各自安帖家邦切忌  
放賊過界 退菴奇

涅槃地獄本無差祇爲從前被眼遮三脚瞎驢纔踣  
跳鑊湯爐炭卽吾家 高峯妙

常拌白日尋花巷盡把黃金作酒錢反著襴衫高拍  
掌大家齊唱太平年 楚石琦

一葉翩翩不繫船夜深月落正堪眠蘆花兩岍無餘  
影白鷺飛來破曉烟 卽念現

維摩因須菩提持鉢入維摩舍乞食時摩詰取鉢  
盛飯謂言汝能於食等者諸法亦等諸法等者於

食亦等如是行乞乃可取食乃至彼外道六師是  
汝之師因其出家彼師所墮汝亦隨墮乃可取食  
入諸邪見不到彼岍住於八難不得無難同於煩  
惱離清淨法汝得無諍三昧一切衆生亦得是定  
其施汝者不名福田供養汝者墮三惡道爲與衆  
魔共一手作同諸勞侶汝與衆魔及諸塵勞等無  
有異於一切衆生而有怨心謗諸佛毀於法不入  
衆數終不得滅度汝若如是乃可取食須菩提聞  
此茫然不知以何荅置鉢欲出

寶峰清云義出豐年還他摩詰其奈須菩提貪觀天



上失却手撓致令食到口邊被人奪却 廣胤標云  
掩馳說之口奪紛爭之辯莫之敢逆者貴乎明斷尊  
者當時何不取一搏食待伊恁麼道直下塞却渠口  
免得者漢向葛藤窠裏著倒雖然於今看來亦似冷  
地輸他先一著分明笑倒老空生 林友卉云盡謂  
須菩提不能倒拈蝎尾逆捋虎鬚致令食到口邊被  
人奪却殊不知尊者置鉢欲去不是好心

無邊無際休斟酌潮去潮來本自平清濁淺深并苦  
澹一般滋味迴分明 保寧勇

邪見歸依外道師與師同墮復何疑憑君滿鉢盛香

飯午日亭亭腹正饑

張無盡

入林不動草入水不動波鑊湯無冷處合眼跳黃河

鼓山珪

獨坐許誰知青山對落暉花須連夜發不待曉風吹

徑山杲

白日街頭獨自行夜閒屋裏獨自臥山高不礙白雲  
飛竹密不妨流水過 照堂一

維摩智度菩薩母容受一切法而無分別相

一切法離分別相依前諸相自如如春風景裏乾坤  
大無限江山開畫圖 仰山欽



維摩示疾毘耶佛敕文殊往問殊曰彼上人者難  
爲酬對深達實相善說法要辨才無滯智慧無礙  
一切菩薩法式悉知諸佛秘藏無不得入降伏衆  
魔遊戲神通智慧方便皆已得度雖然當承佛旨  
詣彼問疾

瀉山果云居士門高可謂壁立萬仞水泄不通擬心  
則差動念則隔不擬不動落在無事界中作麼生入  
良久云退後退後

冷坐毘耶城百病一時發不得文殊來幾乎無合煞  
徑山杲

示疾毘耶方丈文殊亦難近傍看來無藥可醫祇是

忌口爲上

澗翁琰

詐病從來不可醫文殊特爲下鍼錐事禡一喙長三  
尺問著依前似鼓椎

無準範

手提拂子坐胡床眼似流星鬢似霜終日無言長示  
疾却將好肉剜成瘡

率菴琮

皺斷孃生八字眉者些病痛有誰知文殊鍼出膏肓  
穴也是將爲死馬醫

仲宣瑀

丈室端居錯用心那堪獨樹不成林焉知病在膏肓  
裏却被文殊下一鍼

笑翁堪



維摩文殊師利從無住本立一切法

伊菴權云眼裏藏鍼耳中出氣

自小從來不脫空掘翻海底種青松街頭撞見李三

黑你自西兮我自東

濟水洗

無欠無餘無必無固法法圓融頭頭顯露無住爲本  
兮妙叶難量立一切法兮沙界罔措咄咄好鳥不棲

無影樹

竹浪

維摩不斷煩惱而入涅槃

朝生暮死千萬徧一日幾回相見面展陣開旗放出

來一指動時客戲見

白雲端

維摩三十二菩薩各說竟文殊曰我於一切法無  
言無說無示無識離諸問答是爲入不二法門殊  
又問維摩摩默然殊歎曰乃至無有語言文字是  
真入不二法門

保福展云維摩一默未出化門又云大小維摩被文  
殊一坐至今起不得報恩秀云要起有甚麼難便掌  
雪竇顯舉文殊語畢維摩道甚麼良久云勘破了  
也 琅琊覺云文殊讚善也是杓卜聽虛聲維摩默  
然汝等不得鑽龜打瓦 大滙智云不二法門是默  
然不是默然若是文殊則爲賸語不是維摩一場虛



設報恩秀云橫身為衆不免禍出私門那堪文殊  
點破已露瑕玼直饒天童道現居俗塵而無俗氣也  
是掩鼻偷香 磬山脩云語默上摸索有甚交涉若  
向衆菩薩未啓口處識得根源方知說卽是默默卽  
是說衆菩薩未曾說一字老維摩其聲如雷會麼龍  
象蹴踏非驢所堪 博山來云明修棧道暗度陳倉  
若以語默商量何異鉢盂安足二大士雖則塗脂傅  
粉水洩不通以不二法門較之尚遠在 瀛山闇云  
不二法門文殊盡其神力捶擊不開爭奈保福猶嫌  
未出化門爲甚如此祖關無險易玄路有高低 天

目灑云維摩若不得文殊幾乎病殺

維摩大士去何從千古令人望莫窮不二法門休更

問夜來明月上高峰

明覺顯

虛空鳥跡謾追尋幽鳥投聲又報春若識東西無異  
路淨名一室不平沉

慈明圓

一個兩個百千萬屈指尋文數不辨暫時放在暗窗

前明日與君重打算

白雲端

言言言兮飄風灑雪默默默兮雷轟電掣藕絲孔裏  
騎大鵬等閒挨落天邊月

懶菴需

曼殊問疾老毘耶不二門開看作家珉表粹中誰賞



鑑忘前失後莫咨嗟區區投璞兮楚國臚士璨璨報  
珠兮隋庭斷蛇休點破絕疵瑕俗氣渾無却較些宏  
智覺

深入不二門巧盡反成拙一默定千差常說熾然說

說拙萬古清風寒徹骨松源岳

有無語默謾徒勞居士何曾動一毫世祖功臣三十

六雲臺爭似釣臺高別峰印

夜行侵早盡貪程共聽鷄聲到五更忽覺投明天自

曉各安生理樂欣欣南礪問

漁人有睡時蠶婦無閒日三九夜寒天朔風吹水立

節岩琇

維摩佛以一音演說法或有怖畏或斷疑

或有怖畏或斷疑雙明一句絕鍼錐於斯切莫生欣

厭觀面還須眼似睂禾山方

維摩觀身實相觀佛亦然

眼空四海恣縱橫鼻孔撩天信腳行拏得電光爲火

把却來日午打三更或菴體

四大將無來作有一身以已去方人曾聞打水魚頭

痛我佛原來共一真古南門

金剛世尊食時著衣持鉢入舍衛城乞食於其城



中次第乞已還至本處收衣鉢洗足已敷座而坐  
須菩提言希有世尊

食訖跏趺坐石床斗閒閒氣燭天光幾多業識茫茫  
者衲被蒙頭在醉鄉 水菴一

衛城乞食沿門處祇苑收衣洗足時善現無端讚希  
有斯文安得是如斯 寶葉源

金剛應如是住如是降伏其心

希有希有佛妙理極泥洹云何降伏住降伏信爲難  
二儀法中妙三乘教喻寬善哉今諦聽六賊免遮攔  
傳大士

七手八腳神頭鬼面棒打不開刀割不斷閻浮跳躑

幾千回頭頭不離空王殿 冶父川

截斷從教來滾滾隨流未必去滔滔青山長鎖欲飛

勢滄海合知來處高 心聞賁

金剛凡所有相皆是虛妄若見諸相非相卽見如  
來

法眼益別云若見諸相非相卽不見如來 寶華忍

云大小世尊抱橋柱洗澡不肖則不然若見諸相非

相卽見諸相雖然要見如來卽易見諸相則難 妙

偉俊云大小寶華只解草鞵裏跔跳要見諸相非相



更叅三十年

有相有求皆是妄無形無相墮偏枯堂堂密密何曾  
閒一道寒光爍太虛

冶父川

映林映日一般紅吹落吹開總是風可惜擷芳人不  
見一時分付與遊蜂

心聞賁

金剛一切賢聖皆以無為法而有差別

千巖長云世尊有兩個舌頭無明祇有一個舌頭一  
切賢聖皆以無為而無差別

一金成萬器皆由匠者智何必毘耶城人人說不二

覺海元

仁者見之謂之仁智者見之謂之智寒時向火熱時  
乘涼健即經行困即打睡仰面看天開口取氣

保寧

金剛一切諸佛及諸佛阿耨多羅三藐三菩提法

皆從此經出

僧問首山如何是此經山云低聲云如何是受持山  
云莫染汚 冶父川云且道此經從甚處出須彌頂  
上大海波心

佛祖垂慈實有權言言不離此經宣此經出處還相

委便向雲中駕鐵船切忌錯會

冶父川

水出崑崙山起雲釣人樵客問來因祇知洪浪巖巒



闊不肯拋絲弄斧斤

投子青

金剛應無所住而生其心

山堂靜坐夜無言寂寂寥寥本自然何事西風動林  
野一聲寒鴈唳長天

治父川

應無所住生其心廓徹圓明處處真直下頂門開正  
眼大千沙界現全身

猷堂定

東村市接西村路南舍花開北舍春山月如銀牽老  
輿又貪縱目上高岑

理安問

月明星稀烏鵲南飛繞樹三匝無枝可棲  
應無所住豁心空金屑依然著眼中驀地虛空連底

石奇雲

脫大千經卷一時通

孤雲權

單槍疋馬走風塵柳色烟花敢近身羌笛一聲遼膽  
喪霜輪現處更愁人

隱元琦

金剛若爲人輕賤是人先世罪業應墮惡道以今  
世人輕賤故先世罪業卽爲消滅當得阿耨多羅  
三藐三菩提

崇壽稠別云心外有法應墮惡道守住自己爲人輕  
賤博山來云縛殺多少人解脫多少人兼雌帶黃  
若以因果評入地獄如箭射

明珠在掌有功者賞妍媸不來全無伎倆伎倆旣無



波旬失途瞿曇瞿曇識我也無

明覺顯

水不洗水誰不知旋嵐常靜太驅馳千年曆日如能  
算免被巡官掌上推

白雲端

四序炎涼去復還聖凡祇在刹那閒前人罪業今人

賤倒却前人罪業山

張無盡

綴綴功過膠膠因果鏡外狂奔演若多杖頭擊著破  
竈墮竈墮破來相賀却道從前孤負我

天童覺

關關幽鳥啼紅翠一榻薰風驚午睡舞袖單衫入市

鄺張公喫酒李公醉

石雨方

故邦不相使單于齧雪吞瓊意自如沙漠十年持漢

節忠英不假鴈傳書

具足有

金剛如來所得阿耨多羅三藐三菩提於是中無  
實無虛

菩提無實亦無虛幾個男兒是丈夫丹穴不歸金鸞

驚碧潭空浸玉蟾蜍

佛慧泉

生涯如夢若浮雲活計都無絕六親畱得一雙青白  
眼笑他無限往來人

冶父川

水中鹽味色裏膠青如來所得一款招成堪笑僧絲  
雖敏手何曾描得誌公真

牧雲門

金剛過去心不可得現在心不可得未來心不可



得

南堂靜舉德山到潭州詣婆覓點心婆問三心不可得上座點那個心德山無語今夜代德山下轉語待他道三心不可得祇向道咄咄老婆不得無禮似恁麼莫太剛麼不然道婆子你從甚麼處得者消息來似恁麼又却太弱麼當時待他道三心不可得點那個心祇向他道與我換熱底一隻來纔擬議便與換却眼睛乃頌云  
過去現在未來心播土揚塵無處尋坐臥經行無不是承當直下莫沉吟

過去心不可得收綸罷釣秋江碧扁舟古岼恣閒眠  
明月蘆花深穩密

承天宗三

現在心不可得法王家法存今昔謀臣猛將定封疆  
說甚隋珠并趙璧

未來心不可得不可得中祇麼得石含玉兮地擎山  
惟證乃知難可測千古流芳誰共知清風匝地有何  
極

三清道士無仙骨八教闍黎毀梵書黑黍崑崙舞花  
鼓天親無著暗嗟吁

或菴體

去歲春風燕子多社前先到舊時窠今年春色歸將



半簾幕蕭蕭不見過

寶葉源

金剛是法平等無有高下是名阿耨多羅三藐三菩提

須彌山頭大洋海底擬欲動時錯矣錯矣

拈松客

金剛若以色見我以音聲求我是人行邪道不能見如來

色見聲求也不妨百花影裏繡鴛鴦自從識得金鍼

後一任風吹滿袖香

塗毒策

盡却耳根并眼底不知何處見如來數聲幽鳥啼寒木一片閒雲補斷崖

荜菴璇

金剛一切有爲法如夢幻泡影如露亦如電應作如是觀

幻化空身卽法身個中無染亦無塵拈匙把箸如明

了掃地燒香不倩人

慈受深

作事存心貴要精不精終是不通靈棋逢絕處著方妙梅到寒時香愈清

閒極雲

暑往寒來總不知有無名相一時離正如黑漆屏風上醉寫盧仝月蝕詩

雪巖欽

華嚴普眼欲見普賢不能得見乃至三度入定徧觀三千大千世界了不可得白佛佛曰汝但於靜



三昧中起一念便見普賢普眼於是纔起一念見普賢乘六牙白象住在空中

翠岩芝云我道普眼推倒世尊世尊推倒普眼你道普賢在甚麼處 林臯豫云纔起一念便見普賢祇如普賢還見普眼麼 崇先奇云普眼不見普賢則且置你道世尊還見普賢麼諸人不得隨人腳跟轉世尊云但於靜三昧中起一念見底是普賢不是普賢若說是前三度爲甚不見若不是又道向空中乘六牙白象不可總作野狐精見解 破闇燈云盡大地是個普賢未舉念時早已相見了也何用作許多

伎倆雖然從前汗馬無人識祇要重論蓋代功

飄飄一鴈落寒空步步追空覓鴈蹤踏破草鞵跟子斷巍然獨坐大雄峯

瞻堂遠

華嚴佛告普眼頗有人能說幻術文字中種種幻相所住處不眼曰不也佛言普眼幻中幻相尚不可得何況普賢秘密身境界秘密語境界秘密意境界而能入其中能入能見

晃晃在心目昭昭居色塵莫將銀世界喚作假銀城

北磻簡

華嚴解脫長者欲見安樂世界阿彌陀佛隨意卽



見

古木雲封暗吐馨微風吹動鳥啼新夜明簾外翻身  
轉滿袖花香滿袖春

本珠玑

華嚴菩薩以菩提心爲家以如理脩行爲家法

浪宕樓頭無籍人零丁利帝可憐生惡義聚是此中  
入佛子住非他處成

北磻簡

丈夫何必硜硜然蘭麝香分妓女邊酤酒烹羊且會  
客尤欣酪酊笑頑仙

靈潤機

張公原不隱深山家住青谿白石灣編得策筇隨處  
賣清風明月爲誰閒

海慧惺

華嚴如有大經卷量等三千界在於一塵中一切  
塵亦然有一聰慧人淨眼悉能見破塵出經卷廣  
饒益衆生

擬破一微塵分明昧此經如何破經卷出此一微塵

北磻簡

華嚴我今普見一切衆生具有如來智慧德相但  
以妄想執著而不能證得

短篷爛醉綠蓑翁月落江村睡正濃曉覺起來雙眼  
碧波心牽動一絲風

斷橋倫

迷是誰兮悟是誰山僧贏得眼如睂新糊紙被烘來



煖睡到天明日上時

無文燦

自沾村酒醉爛如泥開得眼來日又西馳

栗菴鼎

華嚴法界觀法身流轉五道名曰衆生故令衆生  
現時法身不現

佛真法身抵死謾生自沾村酒自把瓷瓶却著衫來

作主人

北磻簡

楞伽五法三自性二種無我

破瓶豈復作瓶事焦種不因生蘖芽如彼靈空槃大  
子毛輪垂法翳開花

鼓山珪

陝府鐵牛白癩嘉州大象耳聾兩個病痛一般咄哉

黍桶不快

徑山杲

楞伽佛語心爲宗無門爲法門

百八全該一句通毫端不涉示真宗無門衍出潑天

戶千聖同途轍不同

竹浪

涅槃諸行無常是生滅法生滅滅已寂滅爲樂

徑山杲云真生無可生真滅無可滅寂滅忽現前蝦  
蟆吞却月 天寧琦云寂滅不現前心心生與滅龜  
毛扇子扇泥牛一點血 天奇瑞云三界大師何得  
似靈龜拽尾旣是諸行無常因甚却存寂滅 興善  
廣云黃面老漢話作兩橛



涅槃譬如猛火不能燒薪火出木盡名爲燒薪  
黑夜三更認子爲賊趕到天明笑殺老伯古南門

心經是大神咒是大明咒是無上咒是無等等咒  
黯淡灘黯淡灘十度船來九度翻惟有三山陳上舍  
擔一柄傘岍上行奈我何無準範

是大神咒四大六根元不有是大明咒三世十方無  
透漏是無上咒海印圓光明已久是無等等咒士農  
工商各成就何故去年梅今年柳顏色馨香依舊等  
閒勘破悟桃花選甚法身藏北斗或菴體

應化聖賢

文殊因菴提遮女問明知生是不生之理因甚却  
被生死之所流轉殊曰其力未充

進山主問脩山主明知生是不生之理因甚被生死  
之所流轉脩云筍畢竟成竹去如今作篾使得麼進  
云你向後自悟去脩云上座作麼生進云者個是監  
院房那個是典座房脩禮謝 羅漢機云有者道與  
麼荅話添上一重枷鎖殊不知文殊等閒出一語如  
金剛王劍纔擬議早是血濺梵天了也雖然今日却  
被機上座捉敗 雲松品云看梢頭日上月下脩山  
主未別機宜腦頂後雲捲風馳進山主慣得其便雖



然如是脩山主禮拜不是好心 木菴標云登高而  
招臂非加長而見者遠順風而呼聲非加疾而聞者  
彰菴提文殊問在苔處苔在問處二俱且從祇如生  
死還干涉得伊麼良久云白日青天切忌說夢

將軍有力下重圍八戶風高馬不嘶兩眼忽開天地  
闊太平無象到今時 中峯本

漁蓑倒挂祇麼行苦雨惡風晝掩門陣陣吹來迷古  
渡閒愁徒自向誰分 法林音

文殊問菴提遮女曰生以何爲義女曰生以不生  
生爲生義曰如何是生以不生生爲生義女曰若

能明知地水火風四緣未嘗自得有所和合而能  
隨其所宜以爲生義又問死以何爲義女曰死以  
不死死爲死義曰如何是死以不死死爲死義女  
曰若能明知地水火風四緣未嘗自得有所離散  
而能隨其所宜以爲死義

生無所生死無所死風動塵飛波沈浪止和合離散  
隨處發現滿月彎弓雙鷗一箭 佛性泰

問處分明苔處端當機覲面不相瞞死生生死原無  
際月上青山玉一團 簡翁敬

文殊合善財採藥曰是藥者採將來善財徧觀大



地無不是藥却來白曰無不是藥者殊曰是藥者  
採將來財乃拈一莖草度與殊殊曰此藥能殺人  
亦能活人

五祖戒出善財語云慚愧 首山念云文殊大似掩  
耳偷鈴 瑯琊覺云文殊可謂誠實之言要且額頭  
汗出口裏膠生 馮山喆云善財能採文殊善用非  
但寢疾毘耶直饒盡大地人抱必死之疾到文殊所  
教他個個脫體而去何故解用不須霜刃劍延齡何  
必九還丹 梁山遠云得之於心伊蘭作梅檀之樹  
失之於旨甘露乃蒺藜之園文殊當時與麼舉揚若

不是善財聲應氣求未免一場懔懔還知二老落處  
麼處處綠楊堪繫馬家家門首透長安 天童華云  
文殊被善財換却眼睛 烏石道云盡道善財能採  
不能用文殊能用不能採殊不知兩個漢天共白雲  
曉水和明月流 崇先奇云二人互相熱瞞不顧旁  
觀者哂

是藥拈來更不疑師資相見在臨時從茲病甚無醫  
處殺活還應作者知 佛印元

大地蒼生病似麻吉祥靈藥示無涯其閒殺活難分  
辨又是重添眼裏花 保寧勇



藥病相治貶更褒當機殺活按吹毛毘盧海闊烟波  
靜誰把長竿釣巨鰲

照覺總

採藥與用藥相逢一會家殺人活人不眨眼白玉無  
瑕却有瑕

石田熏

無著菩薩問善財曰我欲見文殊何者卽是財曰  
汝發一念心清淨卽是無著曰我發一念心清淨  
爲甚麼不見財曰是真見文殊

神鼎揆云無著不見文殊顛預不少善財鈎頭有餌  
頭上安頭若起心精進得見文殊三生六十劫復頌  
不見如何真是見水中鹽味色膠青翻憐掩鼻偷香

者眼裏無筋一世貧

無邊身菩薩將竹杖量世尊頂丈六了又丈六量  
至梵天不見其頂乃擲下杖合掌說偈曰虛空無  
有邊佛功德亦然若有能量者窮劫不可盡

白巖符云無見頂相莫說一無邊身設使百千萬億  
無邊身盡其神力窮未來劫亦量不盡雖然乃擡眸  
云白巖者裏不消一覷 法林音云白巖也是貪觀  
天上殊不知世尊無見頂相被無邊身狼藉殆盡  
點天棒月浪施功竹杖拋時親到頂夜深摸著枕頭  
邊被窩肩滿朔風冷

三峯藏



利益菩薩白然燈佛我欲得阿耨菩提唯願世尊  
教示我令速成菩提燈曰利益汝觀此世閒何者  
一法是汝所問

舍元殿裏話長安明暗雙雙互熱瞞無量劫來成底  
事依然忘却寶華冠 澗菴怡

宗鑑法林卷三 終

宗鑑法林卷四

舍利弗 須菩提 賓頭盧 殃崛

那吒 七賢女 老姥 善財

廣額屠 天親 勝思惟 障蔽

入定僧 雙林慧 忻州翁 臺山翁

寶誌公

卷五

南嶽思 杜順 布袋 秦跋陀

波羅提 梵志 豐干 寒山

拾得 智者 志言 迦葉



阿難

商那和修

優波鞠多

提多迦

婆須密

伏馱密多

脇尊者

富那夜奢

馬鳴

龍樹

僧伽難提

鶴勒那

師子

婆舍斯多

般若多羅

卷六

初祖

二祖

三祖

四祖

五祖

六祖

卷七

牛頭融

安國挺

天柱崇

鶴林素

徑山欽

鳥窠林

蒙山明

嵩山安

嵩嶽竈

嵩山極

終南政

南陽忠

永嘉覺







